

YONA

Yona'a mago polofeti vekamo mai'neni Gotitegati gemo alinineno aeno hakalo huno hapa pai'niye. Goti'a Yonafe'mo, alo huka alopa taonimo Niniva taonifi'mo uka ge'nimo aeka hakalo huka hapa paitekae'mo ge hapauvo, huno ha pai'niye. Ha pai'niya'monanafa Goti ge'amo akame osuno aune hetaleno Tasisi taonifi'mo visiyafe'mo sipifi'mo haino mai'niye. Ne'vigeno'ae'mo lusi yasimo ali'nige'a sipifi'mo ali'ya ne'aliya vaya'mogi Yona'a asagau'a anipi'mo yaga au'a atale'nageno alopa noyamemo'a alino nakaiteno uno ani agi'nale'mo Yona'mo mu valino ate'niye.

Halate Goti'a Yona'mo alino ate'nigeno uno Niniva taonifi'mo mai'naya vaya'aife'mo, Goti'a Niniva taonimo alino hano huno atalegaiye, huno hapa pai'nige'a afite'a apaipamo ali'a afe le'nae. Apaipamo ali'a afe le'nageno Goti'a o'apamagi'niya'mofe'mo Yona'a ohau'nigeno aipamo le'niye. Goti'a Yona'mo alino api aino ateteno, nagaemo Niniva vaya'aife'mo nahau hu'na ne'apatova kava'mo alagepa kava'mo hane'niye, huno ha pai'niye.

Yesu Kalaisi'a Yonafe'mo ava gemo huno Yu vaya'aife'mo hapa pai'niye. Matiyu 12:38-41 gemo hane'nigi agetapa lekana paiyo.

Yona'a ataleno aune hetaleno u'niya gemae

1 ¹Ala kava ne'mo'a Yona'mo Amitai mafa'nee'mo ha paino'ae'mo, ²Alo huka alopa taonimo Niniva taonifi'mo uka ge hapauvo. Lusi hosu kava'mo nehage'na apake'nove, huno ha pai'niya'monanafa ³Yona'a Ala kava netegati'mo ataleno aune hetaleno Tasisi taonifi'mo ugefe'mo hu'niye. Ataleno uno Yopa taonifi'mo lamino Tasisi taonifi'mo ugefe hu'niya sipimo miya faiteno sipifi'mo haino mai'niye. Yona'a Ala kava netegati'mo ataleno aune hetaleno u'niye.

⁴Aune hetaleno ne'vigeno'ae'mo Ala kava ne'mo'a lusi lokiya yasimo alino ate'nigeno solovala anite'mo alinino e'niye. Lusi yasimo alige ko aige hu'nigeno ani'mo'a aino holakau holakau huno sipimo aeno atava aisiya agufa kava'mo hu'niye. ⁵Sipifi'mo ali'ya ne'aliya vaya'mogi lusi kava hu'a apamo'ya ai'a hapausoli hute'apae'mo goti'apimogife'mo apamete apamete hu'a, laha mao laha mao, hu'a keya ae'nae. Sipimo'mo kana osisiyafe'mo sipifi'mo hane'niya kagemi ya'mo ali'a anipi'mo yaga au'a atale'nae. Ani kava hu'nageno'ae'mo Yona'a anagamo o'mai'nifa sipimo afepilagamo lamino au kaleno mai'niye.

⁶Sipifi'mo ali'ya ne'aliya vaya'aite'mo yagaino ne'apateya vekamo'a ageyana Yona'a afa'age'mo au kaleno mai'nigeno ageteno'ae'mo, Na kava higekae'mo kau kaleka mai'nane. He tika kagaika gotikamofe'mo keya aeka ge huvo. Ofalisunafe'mo afiteno laha maesifi laha o'maesifigi ge huka afi go, huno ha pai'niye.

⁷Sipifi'mo ali'ya ne'aliya vaya'mogi apakai'api apakai'apimo hu'apae'mo, Lagitimo avo'mo kaeteta kupi'mo ai male'neta kupati'mo ina la agimo alisupi mani ne'aluna hanageke ya'mo aepa vekamo agaemae, huta agegaune, hu'a hu'nae. Ani kava hute'a Yona agimo ali'nae.

⁸Apakaemo Yonafe'mo, Mani ne'aluna hanageke ya'mo aepa veka'amo ina la'ae. Na kava higekae'mo sipifi'mo mai'nane. Kagaemo haiya kotega vekamo mai'nane. Haiya nofi vayapati vekamo mai'nane, hu'a loka hu'a afi ge'nae. ⁹Afi ge'nageno'ae'mo, Himulu nofi vekamo mai'nove. Ala kava ne'mo koku'napi ne'maiya Goti'mo solovala ani'e mopa'e'mo alo hu'niya Gotife'mo mono nehuva vekamo mai'nove huno hapa pai'niye.

¹⁰Ani gemo afite'apae'mo sipifi'mo ali'ya ne'aliya vaya'mogi lusi kava hu'a apamo'ya aite'a, Kagaemo lusi hosu kava'mo hu'nane, hu'a ha pai'nae. Hogoteno yasimo o'ali'nigeno'ae'mo Yona'a, Nagaemo Ala kava netegati'mo atale'na naune hetale'na ne'ove, huno hapa pai'nige'a ago afi'naya'mofe'mo lusi hosu kava'mo hu'nane, hu'a ha pai'nae. ¹¹Solovala ani'mo'a lusi kava huno ayamukiki huno mago'e mago'e huno aino holakau holakau hu'nige'apae'mo sipifi'mo ali'ya ne'aliya vaya'mogi Yonafe'mo, Kagaetegamo na kava hisunageno ani'mo afa'a hanesigeta ugune, hu'a afi ge'nageno ¹²Yona'a, nasagautapa yaga auta natalegeno'ao ani'mo afa'a haneno, huno hapa pai'niye. Ago afi'novana ani'mo'a lapakaetegamo lusi kava huno aino holakau holakau nehiya kava'mo aepa vekamo nagaekemo mai'nove, huno hapa pai'niye.

¹³Sipifi'mo ali'ya ne'aliya vaya'mogimo ani agi'nale'mo visayafe'mo latapa kayoteti'mo apaya mukiki hu'a ani'mo avale'a apakamelaga ataleme ataleme u'nayana ani agi'nale'mo malage hu'a o'u'nageno yasimo alige ani'mo'a mago'e mago'e huno aino holakau holakau huge huno mai'niya'mofe'mo afa'a o'u'nae. ¹⁴Apakaemo Ala kava nefe'mo, Ala kava nene, hu'a, Mani vekamo asagauta anipi'mo yaga auta atalegauna'mofe'mo ani kava'mo anona'atimo alagi olategeta afa'a maino. Vaya'mo ne'apamagiya vaya'mo agoti huka ne'apatana kava huka agoti huka olato. Ala kava nene, Kagaemo ani kava'mo alika lave li'nane, hu'a ha paite'a ¹⁵Yona'mo asagau'a anipi'mo yaga au'a atale'nageno'ae'mo ani'mo aino holakau holakau osuno afa'a hane'niye. ¹⁶Sipifi'mo ali'ya ne'aliya vaya'mogi ani kava'mo agete'apae'mo Ala kava nefe'mo lusi kava hu'a koli hute'a afumo amagi'a Goti'mo ofalinimo amite'a mago alagepa kava'mo hisayafe'mo magoke magoke vaya'mogi, ina kava hugune, ma kava hugune, hu'a hute hute hu'nae. ¹⁷Ala kava ne'mo'a alopa noyamemo

alino ate'nigeno uno aka hu'neno Yona'mo alino nakaitalegeno lamino lole'e mago'e feluga'e hani'ilaga'e'mo noyamemo agupafi'mo mai'niye.

Yona'a Gotife'mo nunumu hu'niya gemae

2 ¹Yona'a noyamemo agupafi'mo mai'neno'ae'mo Ala kava ne'mo Goti'amofe'mo nunumu hu'niye. ²Nunumu huno'ae'mo, Ala kava nene, Alopa hanageke ya'mo ali'ne'na naipafi'mo lusi kava huno nagafu ki'nige'nae'mo kagaefe'mo keya ae'na ge hu'nogekae'mo ge'nile'mo aeka atagaina hukae'mo naha mae'nane. Nagaemo fali'naya vaya'mo u'a mai'naya kotegae'mo agi'amo Siyo kotegati'mo, naha mao, hu'na keya ae'na ge hu'nogekae'mo ge'nimo afi'nane. ³Kagaemo alika yaga auka natale'nanage'na emi'ne'na solovala ani'mo afepilagamo mai'nove. Ani'mo'a faino ku aiteni alagi aeno nati kae'niye. Ani'mo'a lusi kava huno ayamukiki huteno aino holakau huno aeno naga seteno aeno nati kae'niye. ⁴Ago alika naha faika natale'nana'monanafa halate kagae aote mono nofe'mo aulu hegauve. ⁵Ani'mo'a aeno naga seno aeno nati kae'nige'na navamusa'mo no'auve. Solovalapi kahaumo'mo nagenopale'mo kino nati kae'niye. ⁶Nagaemo ave aiyafi'mo emi'ne'nogeno'ae'mo ka'nimo akanino nate'neno natafauno nate'niya'monanafa kagaemo Ala kava ne'nimogamo nagufamo kasalisiya kelifati'mo navalelika haikeka nate'nane. ⁷Ala kava nene, Falisuva agufa naipamo kali'niye, hu'na hute'na kagaefeke'mo nagesamo afi'na ho hute'na nunumu hu'nova ge'nimo'mo kagae aote mono nopi'mo faleno hai'niye. ⁸Aigofe goti'apimogife'mo mono nehaya vaya'mogi kahau huka apatesana Gotigamo ago katale'nae. ⁹Katale'naya'monanafa yokemo hu'na kagikale'mo ali'na asaga huguve. Mago ofalinimo kamigekana hu'na navayafati'mo kagikale'mo ali'na asaga huguve. Ani kava huguve, hu'na nago'ya atale'na kaha pai'nova gemo amagi'na o'atalegauve. Ala kava ne'moke'mo vaya'ai apakufamo alino katino ne'apate, huno nunumu hu'niye.

¹⁰Ala kava ne'mo'a noyamee'mo ha paigeno uno ani agi'nale'mo Yona'mo mu valino ate'niye.

Yona'a Niniva taonifi'mo u'niya gemae

3 ^{1,2}Halate Ala kava ne'mo'a Yonafe'mo, Alo huka alopa taonimo Niniva taonifi'mo uka ago kaha pai'nova gemo aeka hakalo huka hapa paiyo, huno ha pai'niye. ³Ha pai'nigeno Yona'a Ala kava ne'mo ge'amo afiteni alo huno Niniva taonifi'mo u'niye. Niniva taonimo alopa taonimo hane'niye. Mago vekamo'a ani taonifi'mo magokayaga atupalegati'mo usiyana lole'e mago'e feluga'e hani'ilaga'e'mo maima maima uno magokayaga atupalegamo ava'yi hisiya agufa alopa taonimo hane'niye. ⁴Yona'a ani taonimo magokayaga atupalegati'mo uno magoke

felugamo maiteno uno taoni folagapi'mo muki vaya'aife'mo, Foti'a afina'mo utesigeno Goti'a Niniva taonimo alino hano huno ataleteno alino lapago'ya lagauno lapatalegaiye, huno aeno hakalo huno hapa pai'niye. ⁵Niniva taonifi'mo mai'naya vaya'mogimo Goti ge'amo ani gemo afite'apae'mo, lama gemo hu'niye, hute'a apakesa afi'a fatago hu'nae. Lagaemo ina agufa vaya'mogita'e ala lagi vaya'mogita'e'mo laipamo alita afe leteta ne'ya'mo mosi'neta kogu agufa kukenamo alita vaiteta maigune, hu'a hu'nae.

⁶Ala kini veka'apimo Niniva vaya'aite'mo yagaino ne'apateya vekamo'a ani gemo afitenoa'e'mo yagaino ne'apateya siate'mo fai mai'niyateti'mo he tino vaili'nenno yagaino ne'apateya kukenamo asagino maleteno kogu kukenamo alino vaiteno la'nefafi'mo itopale mai'niye. ⁷Agaemo mago ke'aepa gemo huteno Niniva vaya'aitegamo atale'nigeno uneno hu'niye. Ani gemo huno'ae'mo, Ala vekatapimo'na'e yahauve vaya'e'mo ke'aepa gemo hu male'none. Ani gemo hutae'mo, Muki vaya'amogitapamogi pulumakagi sipisipimogi hutapa ani'mo o'nege ne'ya'mo o'nege hutetapa afa'a mositapa maiyo. ⁸Muki vaya'amogitapamo kogu agufa kukenamo alita vaitetapa afumo kogu kukenamo alita kofitapa apateyo. Gotife'mo lokiya vaitapa nunumu hiyo. Muki vaya'amogitapamo lapaote lapaote hutapa hosu kavatapimo ataletetapa vaya'mo ne'apamagiya kava'e kaveta nehaya kava'e'mo ataletetapa maiyo. ⁹Goti'a ani kava'mo huguve, huno hu'niya ge'e aipamo leno late'niya kava'e'mo atalesifi o'atalesifigeta ofalisunafe'mo amalageka huta agegaune, huno hapa pai'niye.

¹⁰Ani kava hu'a hosu kava'apimo atale'nageno Goti'a apaketenoa'e'mo aipa agesamo alino afe leteno ani kava'mo huguve, huno hapa pai'niya kava'mo osuno atale'niye.

Goti'a aipamo'mo falu huno apate'nigeno'ae'mo

Yona'a aipamo le'niya gema

4 ¹Goti'a hu'niya kavafe'mo Yona'a alagi ohau'nigeno'ae'mo aipamo le'niye. ²Yona'a nunumu huno'ae'mo, Ala kava nene, huno, Ko'nimo atale'na o'me'nova afina'mo ani kava'mo hugane, hu'na hu'nofiye. He, ani gemo ago hu'nove. Ani kava'mo hugane, hu'na nagesamo afi'novamofe'mo atale'na naune hetale'na Tasisi taonifi'mo ugefe'mo hu'nove. Ago afi'novana kagaemo fiku hapa maeka apamiteka kahau huka ne'apatana Gotigamo mai'nane. Kaipamo malage huno nole. Kahau kayamopafi'mo kahau'niya kava'mo asole kavakamo hane'niye. Kagaemo vaya'mo apamagisanafe'mo okahau'niya'mofe'mo kaipa kagesamo alika afe nelane. ³Ani kava nehana'mofe'mo Ala kava nene, hu'na, Hemenimo afa'a ne'mauva ya'nile'mo alige'na ago falino. Afa'a maisuvana kanale osugiye. Kanale kavanage'na afa'a faliguve, huno nunumu hu'niye. ⁴Ala kava ne'mo'a, Yonao, huno, Kaipamo neleya kavakamo'a kanale kava'mo

nehapiye, huno afi ge'niye. ⁵Yona'a taonifati'mo ataleno malaga lamino yegemo haine ne'eya kategamo uno uluna no'mo kiteno ulunapi'mo mai'nenno taonifi'mo na agufa kava'mo afole aisifi huno agava mai'nenno ageno mai'niye.

⁶Ala kava ne'mo Goti'a yegemo o'alesigeno ulunapi'mo maisiyafe'mo nofife'mo, hago, huno hu'nigeno nofi'mo hageteno no yosale'mo kino hai'niye. Yona'a ani nofife'mo lusi kava huno amuse hu'niye. ⁷Egamo kotilamiyapi'mo Goti'a mago kafamo alino kayo ate'nigeno eno nofipi'mo ne'nigeno falu te'niye. ⁸Yegemo haineteno le'nigeno'ae'mo Goti'a amuko yasimo alino ate'nigeno amuko yasi alige yegemo'mo Yona agenopale'mo alege hu'nigeno Yona'a aulagamo'mo atete huteno kalafe kalafe hu'nigeno faligefe'mo hu'niye. Yona'a Gotife'mo, Faliguve. Afa'a maisuvana kanale osugiye. Kanale kavanage'na afa'a faliguve, huno ha pai'nigeno ⁹Goti'a, Nofi'mo falu te'niya'mofe'mo kaipamo le'nigeka kanale kava'mo nehapiye, huno afi ge'nigeno'ae'mo, he, naipamo lusi kava huno le'nige'na alagepa kava'mo nehuve. Afa'a faligesuve, huno ha pai'niye.

¹⁰Ala kava ne'mo'a, Ani nofite'mo yagaika o'atege alagepa huno hanesiyafe'mo ali'ya'mo o'alige huka mai'nane. Ani nofi'mo magoke hani'ilagamo malage huno hageteno alu hani'ilagamo ago falu te'niye. Ani aise nofi'mo ina agufa nofife'mo kahau huka ne'atane. ¹¹Ani kava hu'na Niniva vaya'aife'mo nahau hu'na ne'apatove. Niniva taonifi'mo lusi asole nute mafa'ne anaga'mo vani hataleti tuveta tauseni'amo (120,000) maige asole afumo maige hu'a mai'nae, huno ha pai'niye.